



Broj: 06-1-07-1-763-10/11  
Sarajevo, 30.06.2011. godine

Na osnovu člana 14.2 stav (1), a u vezi člana 14.3 Izbornog zakona Bosne i Hercegovine („Službeni glasnik BiH“, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08 i 32/10), Centralna izborna komisija Bosne i Hercegovine je na 44. sjednici, održanoj dana 30.06.2011. godine, **d o n i j e l a**

**O D L U K U**  
**o odgađanju prijevremenih izbora za načelnika Općine Travnik**  
**zakazanih za nedjelju 24.07.2011. godine**

(1) Prijevremeni izbori za načelnika Općine Travnik, zakazani za nedjelju, 24.07.2011. godine se odgađaju, s obzirom da nisu ispunjeni uslovi iz člana 1.2b i 1.2a stav (2) Izbornog zakona Bosne i Hercegovine.

(2) Po osiguranju finansijskih sredstava u budžetu Općine Travnik i uplate istih na Jedinствен račun trezora BiH, Centralna izborna komisija Bosne i Hercegovine će donijeti odluku kojom će utvrditi novi datum održavanja prijevremenih izbora za načelnika Općine Travnik.

(3) Sve odluke, poduzete radnje i izborne aktivnosti donesene i provedene shodno članu 2. stav (2), (3),(4), (5), (6) i (7) Uputstva o rokovima izbornih aktivnosti za održavanje prijevremenih izbora za načelnika Općine Travnik broj: 06-1-07-1-763-2/11 od 25.05.2011. godine su važeće i neće se ponovno provoditi, a nove rokove za izborne aktivnosti u stavu (8) do (25) će utvrditi Centralna izborna komisija Bosne i Hercegovine u Uputstvu o izmjenama Uputstva o rokovima izbornih aktivnosti za održavanje prijevremenih izbora za načelnika Općine Travnik.

(4) Ova Odluka stupa na snagu danom donošenja i objavit će se u: “Službenom glasniku BiH”, “Službenim novinama Federacije BiH”, “Službenom glasniku Republike Srpske”, “Službenom glasniku Brčko distrikta BiH” i na web stranici Centralne izborne komisije BiH [www.izbori.ba](http://www.izbori.ba).

(5) Odluka će dana 30.06.2011. godine biti objavljena na web stranici Centralne izborne komisije BiH i smatrat će se da je ista dostavljena svim učesnicima u izbornom procesu.

**O b r a z l o ž e n j e**

Centralna izborna komisija Bosne i Hercegovine je na 36. sjednici, održanoj dana 25.05.2011. godine, donijela Odluku broj: 06-1-07-1-763-1/11 od 25.05.2011. godine o raspisivanju prijevremenih izbora za načelnika Općine Travnik, koji će se održati u nedjelju 24.07.2011. godine.

Članom 1.2b Izbornog zakona Bosne i Hercegovine je propisano da kada načelniku općine prestane mandat, sredstva za provođenje novih izbora osiguravaju se u budžetu općina, a članom 1.2a stav (2) Izbornog zakona Bosne i Hercegovine je propisano da se: „u budžetu entiteta i kantona osiguravaju nedostajuća sredstva za finansiranje obaveza iz stava (3) ovog člana“.

Članom 1.2a stav (6) Izbornog zakona Bosne i Hercegovine je utvrđeno da se sredstava za provođenje izbora moraju obezbijediti u roku od 15 dana od dana donošenja odluke Centralne izborne komisije Bosne i Hercegovine o raspisivanju izbora.

U skladu sa članom 2.9 Izbornog zakona Bosne i Hercegovine, Centralna izborna komisija Bosne i Hercegovine je odgovorna za blgovremeno štampanje, distribuciju i sigurnost glasačkih listića, info kampanju, reguliranje zakonitosti rada izbornih komisija, objavu rezultata izbora na svim nivoima izbora u Bosni i Hercegovini.

Na zahtjeve Centralne izborne komisije Bosne i Hercegovine za osiguranje sredstava za provođenje prijevremenih izbora za načelnika Općine Travnik broj: 07-1-16-1-786-1/11 od 03.06.2011. godine i broj: 07-1-16-1-786-4/11 od 14.06.2011. godine, dostavljene Općinskom vijeću Travnik, kao i na zahtjev broj: 07-1-16-1-786-6/11 od 26.06.2011. godine, dostavljen predsjedavajućem Skupštine Srednjobosanskog kantona, premijeru Vlade Srednjobosanskog kantona i predsjedavajućem Općinskog vijeća Travnik, Općinsko vijeće Travnik nije ispunilo svoju obavezu, niti je obrazložilo razloge nepostupanja.

S obzirom da nisu ispunjeni uslovi iz člana 1.2b i 1.2a stav (2) Izbornog zakona Bosne i Hercegovine, odnosno nisu osigurana sredstava za provođenje prijevremenih izbora za načelnika Općine Travnik, Centralna izborna komisija Bosne i Hercegovine nije mogla izvršiti organizaciju i provedbu prijevremenih izbora za načelnika Općine Travnik u zakonskom roku (štampanje glasačkih listića; štampanje postera; štampanje obrazaca-BS, BSN, BSM, Zapisnik o radu ZARBO, ZR, ZRO, ZRP, ZRPO, ZRG; štampanje konačnih biračkih spiskova; prevoz izbornog materijala i nabavke neophodnog materijala za biračka mjesta).

Na osnovu naprijed navedenog, a u skladu člana 14.2 stav (1) Izbornog zakona Bosne i Hercegovine, Centralna izborna komisija Bosne i Hercegovine je odlučila kao u dispozitivu ove odluke.

**PRAVNA POUKA:** Protiv ove odluke, u skladu sa članom 6.9 stav (1) i (2) Izbornog zakona Bosne i Hercegovine, može se podnijeti žalba Apelacionom odjelu Suda Bosne i Hercegovine u roku od dva dana od dana objavljivanja ove odluke na web stranici [www.izbori.ba](http://www.izbori.ba). Žalba se podnosi putem Centralne izborne komisije Bosne i Hercegovine neposredno u sjedištu Centralne izborne komisije Bosne i Hercegovine, Ulica Danijela Ozme broj 7 Sarajevo ili putem faks aparata na broj 033/251-329 ili 033/251-307.

Predsjednica

Irena Hadžiabdić

